

四庫全書

集部

欽定四庫全書

集部

攻媿集卷九

六至

詳校官石中允臣薩敏

主事臣呂雲棟覆勘

總校官庶吉士臣倉聖脉

校對官中書臣牛稔文

謄錄監生臣周牧

欽定四庫全書

攻媿集卷六

宋 樓鑰 撰

古體詩

石時亨飽山閣

乾道七年冬見時亨相與登飽山閣淳熙七年  
秋又過之今三十有三年矣時亨書來索詩老  
矣日困憂責之重應酬之繁何處有此慨念舊

遊況昔止齋陳君舉洎薛象先諸公往來必遊  
焉此閣名因以傳黃文叔則又里人也存者無  
幾併于末章見之率爾有作蕪拙媿甚

層層得好山是處足飽看君真樂山者心地尤平寬生  
長山水縣慣見青巒岼築室欲飫賞憑虛著危欄天亦  
遂君意俾君老其間塲屋早得名晚始就一官官又不  
得進甘心樂瓢簞官少家食多知更幾暑寒朝見山嵐  
高暮喜山雲還山氣日夕佳秀色幾可餐晴雨各變態

雪月更萬端于山真屬饜清明流肺肝膏梁與芻豢與  
世殊鹹酸久矣謝世紛屏息專內觀鬢無一莖白八十  
顏如丹所得不既多愈飽天不慳此閣本不華何處無  
此山苟為名利驅人境無相關吾鄉山苦遠可望不可  
攀東樓快登眺聳翠羅烟鬟年來勇欲歸飽繫未許閒  
君索飽山詩南明恍在前十年兩訪君共醉首宿盤向  
時多名流與君平生歡祇今幾人在一見良獨難叔度  
鎮金陵道衡處瀛壖舊遊如晨星相望可長歎歸夢遶

故丘非晚再掛冠何當泛剡谿往從子于盤

林德久祕書寄楚詞故訓傳及叶音草木疏求序

于余病中未暇因以詩寄謝

平時盛歎屈靈均離騷三誦涕欲零向來傳注賴王逸  
尚以舛陋遭譏評河東天對最傑作釋問多本山海經  
練塘後出號詳備晦翁集註尤精明比逢善本窮日誦  
章分句析無遁情林侯忽又示此帙正欲叅攷羣華英  
屬余近歲方苦疾筆硯廢墮幾塵生嘗鼎一臠已知味

始知用工久已成沉復身到荆楚地詳究蘭芷聞芳馨  
前此同朝幸相與錦囊詩文為我傾惜哉不早見此書  
病中欲續神不寧年老耄及屢求去倘得掛冠早歸耕  
尚當一一為尋繹期以爝火裨明星謾揮斐語塞厚意  
深媿所報非瓊瑩

贈黃真護道人游茅山

少年曾上三茅山千巖萬壑窮躋攀烟霏空翠不可狀  
弟兄聯騎欣清閒回頭五十有餘載至今夢境猶班班

初從崇禧入僊境元符玉晨紛幢幡草庵精舍不知數  
各占山麓清溪灣蓑衣相見黑虎谷蒼然白髮猶朱顏  
延之土窟款清論桃皮釀酒無留殘達道所居更奇絕  
萬山開豁如重關一山巉巖似筆格聳秀正矗湖中間  
白馬真人尚生氣長史舊井藏餘丹異石若碎還復合  
泰龍幾處多澄瀾華陽洞門閉已久傳聞亦有游其藩  
撫掌浮漚湧如沸僊人捧石手可扳最奇無如大茅峯  
千尋直上天市壇中峯小峯如雁行下視堆阜羅烟鬟



三君司命時歸降往往天風吹珮環人言春日羽衣會  
胎禽終日來飛翻玄帝大鼎秦皇璧丹砂六千在流泉  
地無虺虎與荆棘但有衆藥堪延年洞天凡蹤不易到  
我欲再往良獨難有時慨想舊遊處陟岡惘惘涕為漣  
江夏僊人有僊骨卓爾拔俗甘瓢簞搖鈴真能徹帝所  
揮鑷自足驅神姦曾入金華訪初平今往地肺求洞元  
游經都城道價重拂袖忽厭拘塵煩徑登紫芝繡衣亭  
咫尺衆真相往還神僊渺茫信可學祗恐涓塵天意慳

但見茅君極僊品誰知求道越岨艱至今豐碑載錫文  
舟墮千劍如指彈君得此居宜勇退勿使學步譏邯鄲  
我欲休官未容去歸夢遇覺多愁歎終當掛冠四明隱  
捫羅采石紉芝蘭江東日暮雲生處安得羽化同霞餐  
舅氏適齋汪公尚書慕香山之高續達哉行集香  
山詩句次韻

脫衣典酒曲江邊不作閒遊即醉眠大抵浮雲何足道  
生理何曾得自全朝廷雇我作閒人髣髴緡錢二三千

一種共君官職冷收得身來已五年五年炎涼凡十變  
老後誰能惜酒錢塵纓世網重重縛七十八十百病纏  
千萬人中無一人自喜天教我少緣六十三翁頭雪白  
貧家強健亦天憐每愧尚書情眷眷為君一醉一陶然  
其間氣味多相似猶在病羸昏耄前月夜徐行石橋上  
累累棟宇相連延歲種薄田一頃餘薄產處置有後先  
更無俗物當人眼遊魚潑潑荷田田為君舉酒歌短歌  
不妨兼有散花天

適齋示池水大篇效元白體相答

適齋一片心世人難與比少時發此念樂施到暮齒婚  
姻成者衆葬埋不知幾義氣追古人仁風動桑梓利益  
及物物方便形事事先正有此言源流固有自外家有  
天池清波照叢桂來者不問誰小大聽盈器及其旱將  
涸一雨復清泚我舅為欣然作詩自言志平生欲濟人  
往往多割已向來俸可分挂冠踰一紀心勤力不逮不  
得盡如意安得有貲財如此池中水來求則應之吾心

斯足矣長篇筆餘力疊疊遂滿紙病足正僵卧三誦為  
之起韻險不容次愚言不能止公曰汝答我只用元白  
體公心與天通言合孟軻氏菽粟如水火此意豈不美  
黃金土同價但恐無此理求水易足用近止及隣里上  
不過飲水下亦止濯洗求財則無厭來不問遠邇應者  
力已竭求者殊未已有如一富翁獨處百家市終焉遂  
什一貧富本相濟餘波被四隣人情皆可喜久之責望  
重爭訟隨謗毀不言理曲直但謂富者鄙堯舜有至仁

獨病在博濟所以漢昭烈其言有深旨富者民之怨百萬輒散棄貧富各有分取予尤不易生長在舅側義事熟于耳頗亦知為人緩急力不計舅言出于仁甥言裁以義二者若不同同歸于一際愛苟無差等兼愛等墨子豈惟道非中安有力及此仁民而愛物要自親親始適齋約同社往來無事形迹次韻

舅氏年益高何止七十稀神明曾未衰髮黃齒如兒義概同古人閭里咸歸依度量海深濶仁愛佛慈悲居然

三達尊後生願影隨為作真率集率以月為期平生持  
謙柄自牧何太卑善學柳下惠不欲慕伯夷一鄉有善  
士收拾畧不遺以此娛我老今是勝昨非何必汗漫遊  
據龜食蛤蜊但欲客長滿痛飲真吾師鄉黨既恂恂朋  
友亦僣僣凡我同盟人共當惜此時間或造竹所寧容  
掩柴扉耆英古有約不勸亦不辭此意豈不美謹當守  
良規達哉杜陵客從他人見嗤

代魏丞相為錢參政壽

天台傑立滄海東古今名士長相從神遊八極司馬子  
擲金作賦孫興公松牕先生千載士文價道骨相與同  
芙蓉為裳蘭為佩一笑坐斷千山峯向來羽扇揮羣雄  
貔貅給使如奴僮淮南草木識姓字烽燧一掃邊庭空  
勲名巍巍我謝不有天子神聖非臣功黃扉安坐斷國論  
精神自折千里衝東山之志意不改歸來碧落稱僊翁  
調元老手自變理鬢鬢綠髮雙方瞳蒼生顙望謝公起  
中興事業須宗工新冬五日記穀旦霜餘和氣回春風



門牆老生繫郡紱欲借壽筭斟吳松祝公壽考與家世  
山河帶礪俱無窮

代仲舅尚書賦江山得助樓

江山信美非吾土王粲登樓意淒楚麗譙井幹高則高  
未免綺羅相滓污君家華屋照城隅丹壁重重不知數  
誰令作此三層樓雪脊干霄千尺所幾番遺書來索詩  
只許歸田為君賦快哉今日真得歸無復黃塵浣巾屨  
試凭欄干俯人世城郭村畦可枚數四山雲物任卷舒

大江波濤恣吞吐曉看紅日上滄溟夜見冰蟾轉天宇  
四明山水秀東南祇恨青山不肯入城府我家朗朗屋  
百間欲創一樓兄未許羨君輪奐日日新鑿鼓一聲紛  
郢斧眼明見此高突兀騷人當得江山助我久欲歸未  
得閒門巷相望纔尺五賦詩幸不負前盟但慙筆底無  
風雨從今造門不復問主人醉倒樓上君莫喚

代求子紹上魏邸壽詩

皇家基業天與隆金枝玉葉槃石宗我皇聖德摩蒼穹

朱邸森列慶所鍾仲氏吹簫何離離雲夢八九羅心胸  
羣經讀遍巾箱中筆端豪氣舒長虹殿前玉佩聲冬瓏  
天人眉宇輝宸楓大名起魏茅土封黃旂豹尾雙鎮雄  
宣城名郡煩憑熊政績越過黃與龔樓前疊嶂橫雲空  
佳句不減玄暉工賢王易鎮甬水東陽春有腳皆仁風  
百蠻面內文軌同坐清聚蟻驅屯蠹碧海萬里樓船通  
天子神聖非臣功薰風入絃槐陰濃新荷泛綠榴花紅  
曉來佳氣飛青葱驚詫野老田家翁簫鼓動地光融融

堂上帝子方雍容清旦燕賀簪笏叢負弩小吏隨登龍  
由來降靈自神崧難老何用齊喬松年年箕翼壽兩宮  
捧觴戲彩俱無窮

代毛崇夫賀婦翁黃圯老生朝

東都競風節清裁稱巨賢焱馳不自定相與扶其顛獨  
立黃徵君道周性具全辟舉既不就言論亦無傳當時  
論篤士比之孔與顏陳蕃為三公自媿不敢先丈人豈  
苗裔德高靜而專不清復不濁量陂渺無邊學問粹然

正師友承淵源詞章玉無瑕作者當摩肩向來登王畿  
悟主在一言校讎天祿閣朱黃手自研郎潛不啻足肯  
羨歲九遷清朝獎廉退擢居先府員臚仕皆坐致高懷  
越拘攣出乘使者車徑歸卧林泉出處無戚欣鼻間栩栩  
然謝公恐未免召駟行著鞭松山介閩浙淑氣常蜿  
蜒隆冬正凝沍愛日回春妍懸弧慶生申飄若區中僊  
僊風自難老何須記椿年賤子託粉榆掃門如宿緣叨  
在玉潤選得窺樂廣天川涂阻拜壽春容陳大篇孺子

尚可教願受書一編

贈吏部壽詩集老杜句

刺史諸侯貴春城海水邊層城臨媚景水合數百源山  
色佳有餘雲門吼瀑泉遊山憶謝公頻遊任履穿三寸  
如黃金朱橘不論錢瀟洒到江心石瀨月娟娟翠華擁  
吳岳誰扶黃屋尊御榻在嵴嶠佳氣拂周旋多除南省  
郎一麾出守還城中賢府主今之黃穎川筆落驚風雨  
談論淮湖奔羣書一萬卷分明在眼前老氣橫九州黃

鵲摩蒼天歷職漢庭久磊落映時賢  
否臧太常議正直朱絲絃東下姑蘇  
臺戮力效鷹鷂謁帝似馮唐明公獨  
妙年列宿頓輝光馨香粉署妍卿月  
昇金掌等級敢比肩巢許山林志虛  
心味道玄此邦承平日接近與名藩  
時節立復度水旱其數然百波漏波  
濤狂風大放顛江流氣不平地軸為  
之翻人烟眇蕭瑟茅茨寄短椽凋瘵  
滿膏肓誅求何多門至尊方旰食鴻  
雁美周宣平生方寸心窮年憂黎元  
恐辜明主恩筋力不辭煩晨趨閭闔

內應對如轉環制可題未乾御札早流傳斯人亦何幸  
已聞動行軒滯務茲一掃煩苛法令蠲撫養甚分明連  
檣並米船蜂蠆不敢毒歌笑輕波瀾驕陽化為霖江鳴  
夜雨懸公鎮踰歲月人安若泰山且如今年冬祈寒為  
之暄蕭蕭理體靜迴出諸侯先何時降璽書誰能叫帝  
閭絲綸實具新載渥照乾坤借問今何官蓬萊漢閣連  
鴛鴦回金闕曾是正陶甄煊赫舊家聲風流今尚存嚴  
家聚德星文雅見天倫曾參與游夏寔為親弟昆潘與



送喜頻堂後自生萱國與大名新中堂有神僊令子各  
清標芝蘭疊璵璠今朝烏鵲喜僊鶴下人間甘作老人  
星晨霞朝可餐但求椿壽永何曾藉倖佺獻壽更稱觴  
肅肅秩初筵爛漫倒芳樽華燭蟠長烟清朝燕賀人佳  
句染華牋吾非文人特不敢廢詩篇顧惟魯鈍姿喧爭  
懶著鞭出遊翰墨場常受衆目憐尚為諸侯客坐客寒  
無氈未見有知音非理誰與論始知賢主人見我顏色  
溫色容忻有擊豁達露心肝竊效貢公喜兼盡賓主歡

吹噓人所羨推轂期孤騫

琴操

七月上浣游裴園醉翁操

茫茫蒼蒼青山遶千頃波光新秋露風荷吹香悠颺心  
地翛然生清涼古岸搖垂楊時有白鷺飛來雙隱君如  
在鶴與翱翔老先何處尚有流風未忘琴與君兮宮商  
酒與君兮杯觴清歡殊未央西山忽斜陽欲去且徜徉  
更將霜鬢臨滄浪

和東坡醉翁操韻詠風琴

冷然輕圓誰彈向屋山何言清風至陰德之天悠颺餘  
響嬋娟方晝眠迴立八風前八韻相宣知孰賢有時悲  
壯鏗若龍泉有時幽杳彷彿猿吟鶴怨忽若巍巍山顛  
蕩蕩幾如流川聊將娛暮年聽之身欲僊弦索滿人間  
未有逸韻如此弦

楚辭

雪谿僊隱

余讀叢桂堂記而知雙流宋氏之盛觀登科記而知四川類元仲正之名忽過余于寂寞之濱問其所以來則懷閬風之綬而訪其大父閬中君雪谿之僊蹤也其詳見于楊獻子之記矣又言其先君諱庶俊特才多藝閬中素所鍾愛年止四十于是時正仲之生始九閱月爾少長女兄淑仲告之曰汝之生也卜人曰棄之先君不然取洪範攸好德之言作詩以名汝謂壽富康

寧考終是有命焉惟好德在人爲可勉詩末以  
世科爲屬自爾刻本誓斷絕世故將從雪谿爲  
物外游不幸志不克就汝其識之則又泣曰先  
君已矣大父之來四明不知其果何在萬里來  
游志在此也余聞其言而哀其意爲作楚辭以  
招之

君之生今天之西望雪山兮名之以雪谿君之游兮海  
之湄隱於雪竇兮杳然何歸子從其父兮孫訪吾祖子

志不遂兮孫之心良苦嗟嗟閨中君兮棄家而遠遊蹇  
胡為乎不久留其遂蟬蛻塵埃而僊耶其亦肥遯得道  
不死而隱于四牕之幽耶捫蘿以尋于爛平兮既不可  
見莽白雲之廿里兮欲進兮焉求青櫺兮實繁莎羅兮  
花稠鞠侯兮相與羣白鵬兮嘯其儔謂為遠兮何景物  
之良是謂在邇耶將徑之何由肖君像兮茲堂謹奉嘗  
兮良疇君其來兮庶幾其見之君之不來兮徒相羊以  
夷猶

是集傳寫多訛缺處因無善本參校每仍其舊  
此首青櫺句原缺櫺字鞠侯句原缺鞠字今據陸

龜蒙四明山詩小序云有青樨子味極甘有猿謂之鞠  
侯補入又考寧波府志宋耕號雪谿世家雙流紹興中  
為閩中令後仙去其孫德之聞其在四明來訪至雪竇  
山遇蜀僧告以山後爛平山有宋宣教居焉德之攀躋  
至巔果見丹竈而終不得耕所在乃置祠其上  
而歸云足補樓鑰是序所未詳謹附注于此

攻媿集卷六



欽定四庫全書

玫瑰集卷七

宋樓鑰撰

今體詩

姚江高風閣

邑有嚴先生墓

不從文叔作三公  
歸著羊裘大澤中  
石瀨釣臺非故地  
雲山江水自高風  
烟迷宿草古遺恨  
樹擁危樓新奏功  
僊馭飄飄疑不遠  
翩然獨鶴度寒空

夜坐

重雲烟雨日冥冥  
柱礎流津意未晴  
頗得溪風送雲出  
放開山月照人明  
紛紜世態長松影  
荏苒時光流水聲  
坐久蕭然轉琴軸  
為君更作九皋鳴

山陰道中

昨望山陰古道中  
巖山直上最高峰  
今朝更踏山陰道  
卻向雲間認八松

捲上疎簾莫放垂  
迎眸景色自淋漓  
有雲更覺千山秀

不雨爭知萬壑竒  
古道經行盡遺跡  
羣賢風度想當時  
奚囊莫怪新篇少  
應接山川不暇詩

蘭亭別于果鄉

山陰巖壑妙人寰  
十載扁舟空往還  
贊府端能慰牢落  
連朝相與上孱顏  
龍蟠鳳翥無竒畫  
霞蔚雲蒸有舊山  
弔古淒涼更離別  
滿懷秋思到眉間

早行

水餘枯枿尚棲苴  
催促征夫趣曉鴉  
細路繚山穿亂石

輕輿掠樹得飛花  
柔桑彌望兩三里  
脩竹深藏四五家  
徑處不容行客戀  
可憐一步一天涯

水漲乘小舟

一番凍雨洗郊丘  
冷逼征衫四月秋  
只喜青山瀉懸瀑  
不知黃潦漲平疇  
登途已厭頻興輟  
得意何妨且榜舟  
處順安貧聊自適  
未應坎止愧乘流

繡川道中

伏波莫作古胡留  
雨意垂垂未肯休  
不憚征衫有微濕

只愁平地又橫流行人自厭衝泥苦野老方當得意秋  
倦僕如何致千里登天徒笑傳鳴鳩

過蘇谿

處處谿還舍家家石累牆有時逢老稚無事只耕桑野  
色撩詩思村醪引醉鄉山川已如許急雨更斜陽

東陽遇雨

萬壑千巖已飽看更尋佳處為開顏無端早上一番雨  
遮盡東陽縣裏山

即事

雨外山光淡烟中草色鮮斷橋依古岸流水自斜川紫  
樨餘桑表青簾繞樹顛人情兼物態只合付天然

荆坑道中

古澗隨山轉征人趲水行懸崖當步險空翠逼人清石  
路無尋直沙田不畝平千巘得一二亦足慰平生

馮公嶺

百級山田帶雨耕驅牛扶耒半空行不如身倚市門者

飽食豐衣過一生

拈蒼烟雨樓

莫為看山只凭欄  
遠懷猶恨兩山間  
坐深却得無窮趣  
祇看平川一半山

晚步少微閣

落日謝虛閣  
橫琴相對閒  
片雲將急雨  
一笑失前山

夜坐燒香臺

長晝苦炎熱  
夜分涼始生  
電中千嶂立  
琴外一聲鳴  
急

雨催詩思遙空打鼓聲誰知一府地得此意淒清

即事

睡重不知曉山高意得秋風來已落葉潦去忽中洲幽  
閒素所願登臨儘自由瀕溪千萬壑何日上扁舟

卜雨

好風先雨到危欄卻送殘雲過別山不用開襟強披拂  
自然涼意滿人間

烟雨樓夜坐



暮靄橫空黯未收  
晚來涼動滿懷秋  
澹雲影裏千山月  
殘角聲中百尺樓  
參坐共為文字飲  
高談不見古今愁  
夜闌半醉意方適  
徑欲乘風汗漫遊

晚自擬滁亭轉烟雨樓聽角

兩寺疎鐘夾岸聞  
荒烟無數亂前村  
山銜落日雲生彩  
谿溜孤舟水不痕  
蟲羽淒淒鳴綠暗  
星暉隱隱照黃昏  
欲歸重到層樓上  
更為梅花一斷魂

重陽

佳處逢佳節寧辭望眼勞有樓皆眺遠無日不登高野  
栗炊新秣寒萸泛濁醪黃花何太晚籬落上蕭騷

北行雪中渡淮

風捲清淮夜不休曉驚急雪遍郊丘坐令和氣三邊滿  
便覺胡塵萬里收瑟瑟江頭輝玉節蕭蕭馬上點貂裘  
歸來風物渾相似二月楊花遶御溝

泗州道中

宿雪助寒色相看汴水濱輕車兀殘夢羣馬濺飛塵行

役過周地官儀泣漢民中原陸沈久任責豈無人

靈壁道中

古汴微流絕餘民尚子遺高丘祠漢祖荒草葬虞姬  
下空陳迹鴻溝愴近時膏腴滿荊棘傷甚忝離離

陳留柏

驛門深閉柏參天月可中庭夜影圓人靜好風喧客枕  
坐令歸夢到林泉

湘州道中

千古興亡一夢驚就中物理似持衡  
蒿花空染朝歌血  
荒草猶祠美里城但見反身知自咎  
誰言修政欲相傾  
知音只有昌黎操臣罪當誅主聖明

即事

行盡窮邊歲亦殫倚門應是念衣單  
寧知今日幕南地  
不似去年江上寒乘馬惟欣日可愛  
逢人長說雪初乾  
三食四襖半無用何必重歌行路難

臘月二十五日大人生朝

去年沙岸倚歸舟  
今日驅車古涿州  
綵服難陪萊子戲  
巴詞應付雪兒謳  
客途行及五千里  
壽宴須開十二樓  
南望飛雲天樣遠  
太行山外久凝眸

初出燕山

去國三千里還家第一程  
都緣人意樂便覺馬蹄輕  
落日催心速飛雲逐望生  
莫嫌歸去晚猶得趁清明

春雨

石斗微微覆淺沙  
蘭叢短短茁青芽  
春花著眼未云久

花事于人漸有涯

漫漫平湖接遠天  
濛濛細雨濕輕烟  
野橋橫著草深外  
何處渡頭人上船

送人之官池州

春空吹雨作餘寒  
去去扁舟不可扳  
伊昔曾游三大水  
到今獨記九華山  
想君脈脈征途遠  
屬我悠悠夢境間  
回首江山固無恙  
懷人倚待好詩還

春遊遇雨

公子喜青春歡遊弗厭頻久晴都不問好雨卻成嗔桃  
杏紅方入禾苗綠未勻請君停杖履俯念耦耕人

糧料院葵向亭

結屋蒼崖畫不譁峻嶒亂石繞簾牙濤江渺莽三千頃  
烟瓦參差百萬家雉堞環山餘暮雪龍樓聳闕煥朝霞  
登臨可是望都省但有葵心向日華

廨舍小軒

衮衮羣山尾橫窓更此岑塵埃遮物外風物宛山陰作

吏何妨隱尋山不用深居然一丘壑便足快登臨

尺五亭

舊說城南社今登山外亭宮牆步可到御柳望中青引  
嘯千巖響哦詩過鳥聽曲欄頻徙倚歸思渺東溟

挈從子滌歸烏戍外家

五年不泛浙西船今日重來倍黯然葦席不重寒刺被  
菱歌孤唱月搖川咿啞回櫓鳬鷗狎來往輕帆風雨便  
點檢湖山固無恙鵲原遺恨到黃泉



烏戍道中

田在港西家港東斷橋春水步難通  
東蘆挾甌穩來去不礙小船分釣筒

重陽寄雪牕從叔

秋意未教籬菊知不妨烏帽著風吹  
絕憐對酒君歸矣更欲登高誰共之  
風雨滿城千里夢茱萸綴席一年期  
君非俗物敗意者莫為催租便不詩

次伯舅汪運幹大雅所寄韻

金匱山房詩集 卷七  
遙憶牢之舅功名志欲成離思滿方寸望眼費雙明攬  
筆四愁詠登樓千里情賢勞休自歎幢下本書生

佛日山

曉出都城暮入山杖藜蕭散易開顏松風五里未行盡  
隱隱疎鐘紫翠間

遊香山次王正言  
速韻

四山過雨翠光流境勝心閒自點頭野鳥叫春多格磔  
晚風吹鬢故颼颼三年幾作舊山夢一笑喜成今日遊

獨歎寒泉本無意強隨機械走溪溝

過西興

幾載京塵浣客裘江村乍入倍清幽  
柔桑穉麥寒猶在流水落花春又休  
蒼狗浮空驚易失白駒過隙若為留  
細思誰似垂綸者真酒烹魚百不憂

攜家再游姚江

又作泛舟行浮家一葉輕潮生江外晚月比夜來明雲盡天容徹風高水氣清五湖乘興去何苦慕功名

渡揚子

江豚吹浪雨颼颼望斷天涯人白頭  
一舸乘風渡揚子數鷗導我過瓜州

曉霧

曉霧冥濛水拍堤稜嶒亂石與雲齊  
扁舟不用兼程去到得稽城日已西

登巖山

晚步巖山上休辭腳力窮八松不碍眼  
萬里欲乘風逸

興浮滄海高歌徹太空義之不可見猶得想胸中

永嘉試院謝曾使君送酒

一簾疎雨洗塵埃滿架酴醾自在開  
正恨烹茶殺風景忽驚門外白衣來

脫身場屋幾春秋故步重尋我自羞  
閑置有如三日婦畫成應遣一生愁  
與錢誰是老司業送酒更無賢郡侯  
掩卷出門花下坐真成一酌散千憂

木蘊之國博遷居

寄齋今日又遷居門巷相過五尺餘王子何妨借人屋  
淵明不必愛吾廬大千眼裏無非寄三十乘中皆是書  
祀竈卜鄰無用爾祇今天上有鋒車

名大人稱屈心間我自餘言詩今子貢作賦古玄虛鳳  
沼定平進鷗盟殊未疎潭潭府中去只作寄齋居

次南真宮龔道士壁間韻

幽舍足留客疎簷不用林相過幾樽酒清坐一瑤琴野  
鶴伴僊隱閒雲寄此心黃冠如有許來者為低簪

送樂清姚令行可

長官清政玉無瑕  
卓魯循良不足誇  
前席有期吾黨喜  
挽鬚無路邑人嗟  
才高雁蕩千峰石  
惠足河陽一縣花  
欲信三年渾不擾  
遊山今日始携家

入雁山過雙峯

眼前未見古龍湫  
望望前山景自幽  
紅日一門千嶂曉  
翠峯雙聳半空秋  
風高落木無遺下  
氣勁閒雲逐處收  
要識雁山真面目  
直須霜後一來遊

靈峯

老筇扶我轉林丘直到僧房最上頭  
地擁雙峯遮勝境天分半石閃靈湫  
空中大士澹相對山罅清泉空自流  
人謂石崖宜置我不知來此有緣不

龍湫

地聳峰巒秀天開氣象寬  
九霄銀漢落千古玉龍寒  
壯觀供尊者幽居稱冷官  
何時遂肥遯不厭白頭看

又次王瑞安韻



雲鎖千峰碧泉飛百尺湫山蹊驚險絕洞府足深幽谷  
靜搖虛箔巖高卧老虬賈胡還似我到處輒遲留

忘歸亭

一峯凜凜插烟霏誰築新亭占石磯標榜未應專一壑  
此山何處不忘歸

登馬鞍嶺

軋軋輕輿上馬鞍半天嵐翠逼人寒從教宿靄迷清嶂  
明日晴空取意看

游西山次范丞公興韻

東風吹我上西岡更覺僧房白  
晝長草色已翻新歲碧  
梅花祇是去年香好山圍繞  
屏三面野竹蕭森玉數行  
千里同遊逢范叔綈袍他日未相忘

喜雪

曉風吹起雪漫漫來兆豐年喜有端  
玉樹瓊枝無限好  
雪牕高閣不勝寒直疑天上梅花落  
莫作人間柳絮看  
我欲乘風游汗漫倚欄空自羨飛翰

同年翁處招遊北山次韻

不嫌屐齒碎莓苔祇要吾人得得來  
見說飛泉高落澗待尋曲水作流杯  
竹林素約羣賢集雞黍相過一笑開  
政恐清遊自忘返不應空棹酒船回

丈茂先烟蓑亭

人生逆旅困風波大似寄居鸚鵡螺  
月白江空無一事不須更作釣魚蓑

紅梅

南枝零落北枝殘  
失喜新蕤苦耐寒  
莫道北人渾不識  
南人幾作杏花看

秋意次林致甫宗丞韻

河漢秋來淨飛星  
一點過好風吹暑盡  
疎雨送涼多紈  
扇收團月  
梳篦捲細波  
自知恩到骨  
歌枕夢無何

送春

飛花一片減風光  
不待紅稀意已傷  
今歲餘春能幾許  
浮生此日更須忙  
隴頭有雨麥初秀  
林下無人蘭自芳

夜倚疎櫺誦佳句好風如水月如霜

花披催蝶舞柳暗受鶯遷過眼忽新夢回頭誰少年溪  
雲隨筍供山雨近梅天詩思正無賴一聲來杜鵑

病目初愈張子家有詩次韻

年來視物隔襪襪祇有昏花似退之強起歸鴻聊自放  
妙穿懸蟲恐難為相親黃奶交親絕見代青姑事寢危  
寫照苦添雲蔽日不應更誚虎頭痴

許深父餉酒覆於舟中

千里貽書慰寂寥更將尊酒餉今朝先生忽已成烏有  
用事何因見白超醉裏謾思鯨吸海夢回誰悟鹿藏蕉  
何時痛飲論心曲雲滿江東望眼遙

送朝臣濟宰湘潭

君向瀟湘忽語離江城離思亂雲飛傳聞楚俗尤凋瘵  
勿以秦人視瘠肥宰縣要尋行志處監州空有負丞譏  
此行得句須頻寄直到衡陽有鴈歸

即事

芸芸物態見天機  
靜裏工夫得細微  
堦下秋紅千萬點  
游蜂一一採香歸

正月庚申朔

淳熙六年

春來節物一番新  
今歲仍逢臘裏春  
莫訝連宵清不寐  
祇緣守歲守庚申

國清寺

夾道青松引客來  
五峰雙澗擁樓臺  
豐干饒舌留公案  
隋帝遺書暗占煤  
最喜親知來里社  
真成春月上天台

陰雲掃盡尋幽去佳處端疑為我開

山中懷仲兄

雁山曾御九秋風更喜春深到此中芳草絕憐隨意綠  
野花真是映山紅未知方丈景何似直恐桃源路已通  
起聽朝雞無恙否茲遊恨不與君同

天台道中口占

路上人家短竹籬  
繖繖刈麥自熙熙  
可憐日對千尋瀑  
不解閒吟半字書



宿仙居民家

投暝人家欲睡時  
雨聲不斷水平池  
回頭已過三江渡  
醉看車中總不知

寄管儀通判并同官

執別僧房日未斜  
別離愁緒滿天涯  
清宵已落桑桑葉  
小雨頓開喬麥花  
醉裏不知身是客

江南李  
玉詞

酒闌無奈

客思家

歐公夢  
中句

憑誰寄語三夫子  
歸路還須好句誇

贈寶藏老道源

骨相昂藏澗底松平生禪窟儘從容  
幾年大隱清暉閣  
今日來瞻獨秀峰打破畫瓶無罣礙  
大開飯店喜迎逢  
今朝且逐征途去何日重來聽曉鐘

過蒼巖

黃雲滿塢沙田稻白雪漫山薺菜花  
路入縉雲頻借問  
碧香酒好是誰家

崇朝辛苦上孱顏泥徑初平意暫閒  
蒼巖東頭移野步  
眼前便得處州山

發女極目亭

危樓雄據郡城東，掃盡秋雲快碧空。  
目力不容山隔斷，詩情長與酒無窮。  
先分樓下雙溪水，高挹人間萬里風。  
興逸不知真近遠，五弦聲裏送歸鴻。

自阿山歸再過蒼嶺

雨後過蒼嶺，平生行路難。  
危層驚步滑，絕澗覺心寒。  
就嶺山逾險，趨平谷更盤。  
年來輕世故，不作險塗看。

攻媿集卷七

欽定四庫全書

攻媿集卷八

宋樓鑰撰

今體詩

鹿伯可郎中園池雜咏

見一堂

靈澈清詩千載傳始聞林下有斯賢傍人只道休官早

見一名堂已十年

止室

流行坎止事無多舉世營營自網羅珍重主人真止矣  
直如古井更無波

小東山

安石東山志不渝歸來尋得靜工夫從教更為蒼生起  
携妓何妨且自娛

桂堂

芳樹叢生庭砌間高枝更許後來攀主人勿戀山中桂

招隱還應看小山

雲龕

浮雲舒卷原無定此意誰能為飽參出岫無心歸亦爾  
不妨今日與同龕

柑隅

霜著芳苞翠作圍數椽瀟洒映斜暉木奴何必須千樹  
乞得閒身徑且歸

桃蹊

幾樹桃花相映開  
主人歸路入天台  
憑誰寄語玄都觀  
前度劉郎不更來

月沼

玉潔冰清一壑專  
籜龍何處引涓涓  
深知月滿還虧缺  
祇學蟾光一半圓

星潭

山頭分下一泓清  
石甃團團瞰小亭  
身在赤城名絳闕  
至今潭影照郎星



三友徑

公是端人友必端世情冷暖不相干雖云門外可羅雀  
三益還能耐歲寒

竹塢

幾年種竹未成叢一日歸來翠掃空儘好閉門高枕卧  
從今日日是清風

梅坡

江梅留待主人還見說歸時得飽看回首殘花飛作雪

一峯當戶正高寒

松嶺

翠雲深處曳枯筇  
挿碧堂堂十八公  
全似華陽隱君子  
掛冠歸去聽松風

戲贈張漢卿

張侯理窟妙無窮  
雅謔于人亦有功  
渺渺江湖千萬頃  
未聞餓死信天公

陪沈虞卿使君游錢園

休沐無官事公庭且放衙城中尋勝地道上引高牙潭  
府臨芳徑東巖玩物華山林真復絕棟宇謝豪奢陶令  
親栽菊秦侯晚種瓜裴公餘綠野六一醉琅玕幽阪森  
三友飛橋架百花樹深藏曲折谷險路谿舂道院羅星  
斗禪房供釋迦鰲峰思御氣畫舸想乘槎佳處城環雉  
吟邊路遶蛇登山携翠袖喝道屏銀樞井市花相映湖  
陂柳半遮高歌驚野鳥疊鼓亂鳴蛙陞級青珉滑秋千  
綵旆斜叢篁穿嫩筍芳草綻新葩靜憩方開宴徐行更

試茶僊醪斟瑪瑙玉拍奏琵琶清絕囂塵遠蒼茫望眼  
賒詩情彌海嶠飲興渺天涯賢尹民同樂名郎子克家  
才高修月戶筆妙補天媧揮塵風流勝憑欄笑語誇追  
風慚款段倚玉媿蒹葭逸韻迷春蝶清歡接暮鴉舞茵  
收地錦畫燭照籠紗耄稚欣相告輿臺靖不譁微風朝  
趁馬好雨夜隨車土脈興原隰霖膏潤甲芽相將勸耕  
去和氣滿桑麻

巾山曲肱齋

山立青冥外人行紫翠間  
小牕開木末孤塔映江灣  
平楚一何遠白雲相與閒  
我來不暇寢冷坐對前山

廣軒夜望

點點萬家燈風清醉復醒  
廣軒高絕處俯瞰一天星

玉霄亭玩雪

羣齋高晏雪浮空同上山  
城第一重今日無非銀色界  
此亭真是玉霄峯雲迷野  
路舞輕鶴風急瓦溝噓老  
龍便欲相將游汗漫剡溪  
何必訪遺蹤

倅廳雲水亭

山繞澄江江遶城水雲徑接海冥冥萬家曲折在吾目  
一郡登臨屬此亭今日詩題隨處有幾番醉眼望中醒  
風流鄭老知何在回首蒼茫島嶼青

再過鹿伯可

又上先生見一堂澹然賓主兩相忘不知海內清風滿  
但覺山中白晝長小雨絡林妨蠟屐靚妝環坐快瑤觴  
曲終扶杖欲歸去即詠白駒三四章

天姥峰

剡水迂回徹底清  
濫觴從此一泓澄  
曉來蠟屐冲寒上  
磴碎山頭十里冰

虎丘

望望古招提  
茲遊恨已遲  
池深驚地裂  
野曠覺天垂  
聽法人千數  
談空松一枝  
從誰訪遺跡  
惟有石頭知

洛杜老僧聽琴

宴坐蕭齋不作勞  
謂予何事走蓬蒿  
從容試問今年幾

手植黃楊三丈高

自言幾載不聞琴  
屢聽清彈苦契心  
少待庭柯蟬噪靜  
為師更作醉翁吟

中秋

歲歲當秋半  
人人待月明  
絕憐今夜賞  
更勝去年晴  
光彩澄高露  
氛埃廓太清  
衆心方閔雨  
却望暮雲生

又次丁端叔韻

好風涼月湛中秋  
自笑何為作遠遊  
不有諸君故人戀



未應連日賈胡留三千銀界俱呈色十二珠簾總上鉤  
飲罷客歸清不寐誰知心折大刀頭

游惠山

石徑縈迴入翠林廿年故步喜重尋千山直上雲扉啟  
萬木陰中古殿深泉水泓澄風拂拂洞門幽杳盡沈沈  
調琴淪茗清無限倦客忘歸到夕陰

游洞霄宮

宿雨頑雲撥不開紫霄佳處訪樓臺青山九鎖固奇甚

古洞一深如此哉，拔地千林俱秀潤。  
擎天一柱最崔嵬，出山真氣尚相屬。  
數里清溪送我回。

游徑山

起看海日曉團團，更挹神燈照夜闌。  
百萬杉松雙徑杳，三千樓閣五峰寒。  
蟄龍何在渺難問，古井于今竟不涸。  
但覓靈泉歸洗眼，誰能故把細書看。

送蘇伯昌大卿

禁路岩堯欲問津，抗章便自乞閒身。  
閑身閑勞劇部皇情厚，

寓直中奎寵數新飛輓正資經濟手典刑終念老成人  
赤松未許長為伴歸取青氈繼穎濱

甬東曾幸拜蘇天外府官僚復備員前輩風流真在眼  
名公談笑辱忘年浙江相對一卮酒婺港欲行雙槳船  
門鍵馬銜難作遠西風停立但茫然

送劉淳叟博士倅豫章

熟知明主可忠言奏牘方陳意已傳人言能遜千乘國  
我自能補九重天拔山轉石孰難易爛額徙薪誰後先

不用更論如許事把君征袂且茫然

送呂周輔宗丞守崇慶

從昔傳家學當今良史才聲名冠西蜀風節象東臺朝  
蹟收何速歸心挽不回一麾從此去萬里可能來

呂為四川

類試省元曾祖  
陶為給事中

舊矣唐安郡龍潛府號新當年一絳帳今日兩朱輪民  
意來何暮仁聲煖似春劍南毋戀却鰲禁要詞人

祕甚先天學誰傳陸士龍上方留自近天豈不相容契

託君家厚情惟我輩鍾慇懃訓猶子他日使追蹤

上魏丞相

夢菴深坐宴朝曛祇有梅花對此君今日衣冠有巢許  
向來元凱佐華勲入山誰解訪洪景載酒時應問子雲  
童諷寫成心未懶可因貪佛贊論文

次韻蔣德言游太白玉几兩山

西山不到幾經春玉几猶能一再臨太白峯前成夢境  
直從總角到于今

少日游山不要歸老來腰脚不相宜羨君勝具了無勸  
踏雪尋幽更一奇

賸欲扶筇隨意行要令心跡得雙清何時同入翠微去  
丈室先參老淨名

落花影裏步春闌飛鳥翩翩相與還若得把茅成小隱  
等閒來往兩山間

誰能饒舌強參禪何用談因更說緣生死本來無大事  
晨朝須起夜須眠

謝僧道全惠詩并菖蒲

楚楚芳蓀詩樣清  
翠苗低護小崢嶸  
一泓功借幽根潤  
六月能令涼意生  
雁蕩渾如夢邊事  
龍湫頓覺眼中明  
閒牕坐對思無限  
何日隨君遶澗行

趙安國梅坡

隆暑倦行役  
梅坡得暫閒  
卷簾南浦岸  
終日對成山  
竹裏清風遠  
暮邊夕照還  
歲寒重卜醉  
覓句暗香間

資聖寺

野溪清淺度危橋徑策枯筇上紫霄曉霧暗蒸山寺雨  
松風深隱海門潮浮杯水漲人何在洗鉢池清意已消  
又上樂亭基上望雲山萬里更逍遙

次韻蔣德言壁間舊題

一鈴簷角自吟風兩面松篁翠掃空山卉更藏無盡意  
枝頭未作去年紅

上史太傅

一坡煙水綠灣環竹樹樓臺縹緲間但說一丘藏曲折



誰知更有四明山

二十里雲隨步生潺湲洞裏訪青櫺山中要識無窮趣  
看取南雷問答經

衮繡堂中語夜分幾將經史細評論不知世上三公貴  
祇是東湖八行孫

贈鄭相士

知君冰鑑照人寒我相儒酸未足觀東甬從來多俊秀  
為煩著眼細尋看

雪竇道中

城居久矣厭塵勞來訪名山寓鬱陶客路行隨流水遠  
征人與坐白雲高千林舞翠吹蓬鬢二麥搖青照紵袍  
努力共登天尺五要看飛雪噴雲濤

錦鏡

兩溪赴壑若奔虬此地端能截衆流三版放開千丈雪  
一區清徹四山秋幾年空自存公案今日重新指路頭  
珍重老師成勝事清名當與此山留

妙峰亭

一峯高出白雲端俯瞰天涯千萬山  
試向岡頭轉圓石不知何日到人間

隱潭

靈潭深入白雲堆帶雨春雲為我開  
乳石半空渾欲墮瀑泉千尺正中來  
兩軍酣戰鼓輦急一雨生寒霹靂催  
中有卧龍君勿狎有時平地起風雷

游大梅山護聖寺

江東東畔更東山又過東山數里間試問招提在何處  
萬山深處白雲環

寒雲片日忽吹開歷井捫參得得來行盡高山天欲半  
不知平地有樓臺

常禪師塔

旁有虎冢

當時道價極光華鷲獸相隨共一家象去虎亡師亦老  
不須百鳥更銜花

從來猛虎性堅剛據石依林死不僵何待寒林班侍者

千年陪葬祖師傍

梅僊巖

梅山遺跡若為尋怪石峻嶒一徑深未必當時真隱處  
清風自覺襲衣襟

雲巖

但見雲生谷初無石似巖得名非舊觀買地作精藍境  
勝環脩竹門深擁翠杉禪林自家處莫問後三三

啟霞冰壺亭

拍拍新漪徹底清  
兩山寫照翠光凝  
笑看風動縠紋起  
坐我玉壺春夜冰

天童玲瓏巖

捫蘿歷棧上層峰  
寢覺芒鞋踏半空  
七竅幾時開渾沌  
八憲無處不玲瓏  
已欣古洞容身過  
直恐丹丘有路通  
俯視人間懶歸去  
拂衣徑欲御天風

送內弟汪作德赴建德主簿

今日望春下送春  
還送行簿書  
須著意家世有餘清  
瀟

灑桐廬郡文章陸士衡時陸務觀為守公餘定多暇無廢讀書聲

南江酒家

南江舟楫飽經行橋外人家最可人  
賸種寒杉映脩竹快沽村酒趣鮮鱗  
潮痕落草櫓聲動日脚銜山涼意新  
酷愛老樟橫卧處他時來此坐垂綸

宿登山

竹輿來訪小梅山山在空濛紫翠間  
嵐霧滿林朝漠漠

溪聲和雨夜潺潺峯頭丹井隨潮信松下禪房舊祖闕  
誰是無生誰不死晨鐘未響夢先還

羣從泛湖次叔韶弟韻

倚遍瀛洲十二欄老蟾推出爛銀盤絕憐千頃波瀾闊  
更覺滿身風露寒境勝能令詩興逸夜深自喜酒腸寬  
離離掛影清如許莫惜終宵作意看

送陳君舉守桂陽

重尋漫壁認題名十五年來一夢驚誰料今朝携客至



却成此地送君行  
桂陽卧治真談笑  
魯史遺編賴發明  
文定南軒僊去後  
湖湘又得一先生

永嘉天慶觀

斗口橫安華蓋山  
茂林脩竹路灣環  
琳宮迴出滄瀛表  
羽士如遊崑閬間  
東挹江山窮望眼  
西臨闌闌笑塵寰  
自知去此無多日  
著意來尋一餉閒

次許深甫寄陳頤剛韻

博物曾經辨實沈  
論兵更覺用功深  
九閭未進六奇計

萬卷空催一寸心流水高山誰復會寒松春柳解相尋  
如君豈是長貧者作計無令歲月侵

前朝折戟尚沙沈志士私憂意向深謀國未須先問陳  
平戎要且務攻心衣冠舊老知誰在禾黍遺宮尚可尋  
騎省再新人有望一言坐復故疆侵

勸農

一番好雨潤桑麻和氣歡聲十萬家太守勸農終出郭  
老農含哺競隨車土膏澤澤地宜稻雲物陰陰天養花

願得四方無旱潦盡教樂歲似東嘉

書吳夢予古樂府後

古來樂府近來無筆力如君卻有餘日恐遺音亡正始  
喜聞新作過黃初不誇藝苑徒工瑟應免侯門久曳裾  
更向江西詩窟去他年時寄一行書

謝景英送鄭景元篇末見屬次韻

張羅清似翟公門門外都無野雀喧可但風流追鮑謝  
直教高論到羲軒絕憐父子為知己時把文章得細論

箇裏是非何足較，乍賢乍佞一王尊。  
○一本此首後尚有一首云觸暑相過憶去年汝南又得見先賢向來喬木今亡矣祗有靈光尚巋然。賸記暮年專一壑想聞高咏和流泉兩公直諒渾相似其末一句缺載不可攷今附注于此

喜雨次甄雲卿監簿韻

四郊苗槁勃然興，頓覺歡聲滿郡城。  
行且刈雲成歲事，敢因喜雨記亭名。  
昔如魚在釜中活，今見龍從地上行。  
憂國願豐同此樂，讀君佳句欲風生。

又次徐仲宗通判韻

老龍破蟄斬幽關，亂滴天瓢不復慳。  
可但甘霖驅旱魃，自然涼氣滿人寰。  
民心徒切焦熬甚，神力每勞指顧間。  
遙想清都應表賀，紫宸軒陛曉催班。

又次鄭性之縣尉韻

槁項疲農病夏畦，喜聞烟雨四天垂。  
旋尋秔稻供糜粥，驚見新香玉滿匙。

閔雨才寬又畏風，從朝愁到夕陽舂。  
誰教官到二千石，不學當年邴曼容。

幾番好雨應先占  
欣見堦庭綠草纖  
秋後陰晴猶未定  
更看新月卧磨鎌

爰居集魯要先知  
飛雪侵春久已疑  
慚愧風師幸安靜  
敢將虎口闢龍癡

游隱清

簿領叢中偷得閒  
輕輿相與出鄉關  
亂流先已登孤嶼  
采蕨還來上北山  
藤遶龜身增巔屨  
水涵虹影照孱顏  
老農擁道迎人笑  
今日使君來破慳

瀑泉奔放石坡陀回首清游歲幾何脚力不知前日健  
詩盟還喜故人多滕王閣上無韓子遠景樓中欠老坡  
不謂鄙言成宿讖偶因晚泣得波波

窮冬吏鞅解紛纏重入茲山憶少年千里幸同豐歲樂  
三生曾結郡人緣幾番山色望空外今日水聲來耳邊  
坐上何須聽絲竹與君嘯詠和風前

富覽亭

城郭占佳勝眼高貞白翳霜天開浩蕩雲屋涌嵯峨四

面山總好東窻江最多脚跟盤巨石吞吐任風波

贈陳居靖道人

為汭道人身御風棄家求靜慕僊蹤僊都有石立天半  
特立要當如此峯

雪中簡林景思劉振之

驟寒忽變雪花飛挹膝長吟况可知襍被可能來過我  
忍寒相與話新詩

謝林景思和韻



黃昏門外六花飛  
困倚胡牀醉不知  
凍合玉樓猶強項  
擁衾方詠雪巢詩

送趙子固吏部帥合肥

少年文價重神京  
游宦還聞政有聲  
南省但推韓吏部  
北方猶問趙先生  
人傳殿上三千牘  
上喜胸中十萬兵  
暫輟望郎分帥閫  
淮南草木更知名

老韓同傳我多慙  
意氣相傾自不凡  
憂患飽更俱白髮  
班行獨立見青山  
羨君真有虎頭相  
顧我方為馬口銜

同舍幾何俄話別，  
可堪目力送風帆。

襟帶長淮地望崇，  
勲名當繼古英雄。  
吳人止解依濡塢，  
晉將才能過八公。  
可但綏懷邊境靜，  
直須經畧朔庭空。  
折衝不必居遐徼，  
頗牧尤當在禁中。

曲竹

放出一頭地，  
出牆梢更新。  
傍人為稱屈，  
素志肯求伸。  
苦節變甘節，  
曲身成直身。  
青霄看直上，  
莫忘手援人。

寄題汪端明墳菴真如軒

山藏佳處竹藏廬見說離家百里餘已矣空求真學士  
傷哉間殺老尚書後生自恨登門晚壯歲寧忘踈履初  
悵望九京郡可作此心徒切慕相如

萬箇簷簷一草廬傷心理壁十年餘  
草聲誰聽尚書履金榜空懸少保書  
無復遺音追正始尚傳新作過黃初  
真成一代風流盡歎息浮生信六如

題汪季路太傅所藏龍眠陽關圖

離觴別淚為君傾行李匆匆欲問程  
不用陽關尋舊曲

圖中端有斷腸聲

畫出陽關古別離蕭疎柳質不勝悲行人顧歎離人泣  
柳下漁翁總不知

題陳簡齋寄夫人書

行書滿紙遺君文可見閨門敬若賓應與少文能協趣  
定因元亮遂忘貧

題韓氏所藏元祐選尚詔草

禁轡當年選尚初難兄辭寵意何如裕陵遺旨知難改

元祐湛恩信有餘今日猶存卯君筆向來誰造粉昆書  
韓門世寶宜無墜史有遺文尚取諸

秋日懷國仲觀

四明聳秀一溪流曾記經行十里秋行李今從何處住  
宦游自笑幾時休兒時故舊今誰在老去光陰不借留  
贏得東歸訪丘壑約君同上釣魚舟

客省聽燕樂

曉入金門拜紫宸門前錯立士如雲未容密侍君王晏

金大日乃人三言  
卷八  
祗許釣天隔殿聞

次李季章監簿韻

踈履巽巘今幾年見君風度喜楚然長編固已翻青簡  
老墨猶能竇漆烟游宦自欣天影近思家猶在夕陽邊  
時從甥館追清賞賸寫新詩繼謫僊

賀雪八盤嶺上作

平時卧雪似袁安誰肯凌晨犯苦寒百辟班中因族賀  
八盤嶺上得遙看層層觀闕瓊樓聳納納乾坤玉宇寬

悵望僊山何處是欲從此地徑驂鸞

送林子方吏部將漕江東

光堯三紀煥文章寶閣岩堯謹祕藏寓直到君才第四  
皇華禮樂遠增光

望郎三度到長安垂上青雲作好官暫向江東一澄按  
却歸徑著侍臣冠

自說嵇康七不堪上教持節向江南江南父老應相賀  
見說清明似晦菴

殿廬官燭對風簾郎舍修篁共一簷別日苦多良晤少  
摻袂不耐雨纖纖

子方移守四明見于浙江亭

春初送別欠詩篇歲晚還欣受一廛都騎始聞臨浙水  
先聲久已警鄞川里人見說俱延頸海嶠從今定息肩  
夜夜故山頻入夢為君端欲買歸船

寄題蜀李氏義槩堂

君亮著  
作之祖

養氣非為俠輕財弗市恩仁聲高月旦義槩徹天閭稱



美推賢嗣揚名有順孫活人幾百萬何止駟容門

送衛清叔著作提舉淮東

漢庭早已冠羣僊闊步登瀛最少年竊歎豈惟年叵及  
人門才業總翹然

通泰牢盆亘海濱宅家專欲用儒臣淮南草木生顏色  
又見龍頭第一人

虎榜先登到鳳池前良多以十年期雖知勇退急流去  
壯歲功名會及時

羨君持節拜庭闈未老雙親看綵衣若過益公煩問信

坐曹日念舊游稀

外府舊為敕局  
衛乃益侍郎壻

屢從樽酒接從容叔寶風姿照座中他日相逢年益老

棊壇尚可角雌雄

### 送黃景聲秘丞提舉浙西

江夏無雙第一人清明久矣動簪紳心平氣勁無偏黨

好在皇朝作爭臣

宅家親擢得真才柏府蘭堂更外臺未問遙驅向溝壑

半途應有詔書催

從來軒冕一毫輕  
朝蹟初收去玉京  
打破畫瓶無個事  
不妨遊戲繡衣行

論詩纔了便談禪  
鄙吝冰消更豁然  
稽首心空先及第  
敢將癸未論同年

玉節光華照日曦  
揚清激濁正當時  
阿連幸出百僚底  
正恐翁歸不受私

雪中迎駕

都人久不望威顏驚喜鳴鞘風雪間萬井歡聲迎曉仗  
九天和氣下人寰龍樓笑啟瑤池晏鴈序欣趨玉笋班  
道上峰頭皆見日絕勝銜燭照崑山

題尤延之給事所藏葛僊翁徙居圖

莫言家具少于車藥裹衣裳自有餘老婦親携三稚子  
僊翁獨玩一篇書羊牛相與趨新築雞犬無因戀故廬  
到處山頭有丹井不知如此幾遷居

又題楊妃上馬圖

金鞍欲上故徐徐想見華清被寵初後日延秋門下路  
不應有暇作踟躕

題老融歸牛圖

薄宦六年辭故山故山祇在夢魂間簪紳何苦自纏縛  
却羨歸牛自在間

天竺禱晴

早奉天香禱白衣遲明宿霧故淒迷忽驚紅日穿林薄  
無數碧山明澗溪上竺寺連中竺寺蘇公堤映白公堤

湖光一碧幾千頃  
臘捲荷香送馬蹄

具美堂

明光殿裏早催班  
亭午天街從駕還  
已聽歡聲傳市井  
更看喜氣滿湖山  
聯鑣遠去閒尋勝  
爛醉歸來夜叩關  
但願兩宮千萬壽  
退公時得過雲間

水月園

具美盃殘意未休  
相將重上望湖樓  
樓臺忽已居平地  
風月何曾識舊游  
更挈酒樽過水月  
坐增詩興滿滄洲

春風共約新橋畔遙拜雙龍萬斛舟

三月九日從駕

昨日為親壽今朝從駕行君親俱有喜家國共增榮淑  
氣浮黃屋歡聲動玉京人心真易感翻手作昇平

湖山次袁起巖安撫韻

同年紫陌再尋春力主斯盟賴尹京山外斜陽湖外雪  
夜來陰靄曉來晴平波灩灩新添綠凍木欣欣欲向榮  
此日此身清潔甚軟紅何苦太忙生

攻媿集卷八



欽定四庫全書

攻媿集卷九

宋樓鑰撰

今體詩

試俞珣長頭筆

倦遊俞老入中州  
霜兔抽毫飽盛秋  
平日相親管城子  
結交今得賈長頭

訪留昭文于范村山間不得見

黃扉處士掩松關小立松風去住難可歎山中真宰相  
未容神武挂衣冠

送倪正甫侍郎出使

經帷親見犯天顏口伐何勞抗可汗故國應悲周黍稷  
遺黎猶識漢衣冠殊鄰諜報終難測累歲要盟恐易寒  
馳至京城上方畧始知頗牧在金鑾

送王仲言添倅海陵二首

萬卷詩書老雪谿頽然二子和塤簞絕憐伯氏久亡矣

猶幸夫君及見之來上鴈行人未晚往舒驥足自嫌遲  
他時還向雲門否布韞青鞋尚可期

遂初陳迹遽淒涼擊歎青箱極薦揚談笑于儂情易厚  
典刑使我意差強重屏舊畫論中主古殿遺文話阿章  
舊事從今向誰得尺書時許到淮鄉

寄題延平范氏六桂堂

高門儒效許誰同秀氣于今照演峯家學一椿連五桂  
地靈兩劍化雙龍三人衣鉢清名接累世簪纓慶事重

彼茁孫枝更林立不須萬戶羨侯封

京仲遠尚書為澹然子作二大字

濃墨新題付澹然松坡為子老談天憑君推我行年看  
何日歸耕綿上田

送李伯和吏部題舉浙東伯珍寺丞將漕夔門

奕奕君家好弟兄皇華交映棣華明幾年並列金閨彥  
同日俱持玉節行萬里往臨夔子國一江先到越王城  
會聞歸取青氍舊都似當年老貳卿

送范文叔禮部守彭州

憂國鬢先雪愛君心似丹旌麾雖自適懷抱未全寬直道任三黜故人憐一寒濛陽母久駐旋復道鵷鸞

送趙德老端明帥蜀

身名俱泰老尚書叱馭寧辭萬里途兩地恩榮真赫奕四川父老定歡呼乖崖袍帶今重見清獻琴龜我更無頻向籌邊樓上望歸來方畧上新圖

次廬國華提刑所寄韻

持節歸來上粉圍  
祇今一節又何之  
樂天好句追長慶  
元亮高風挹義熙  
我恨別多仍會少  
君雖去速豈來遲  
閩山荔子熏晴晝  
莫惜登臨賸賦詩

古梅遺張時可

枝封蒼蘚澹花疎  
一種風流高更孤  
試問約齋三百樹  
林中還有此枝無

李才翁賀除天官次韻

九年奔走祇思閒  
歸夢時時墮故山  
已媿演綸詞禁上

更堪曳履侍臣間  
官曹顧我空無補  
世事惟君了不關  
但欲相從游物外  
不應久此玷清班

我居銓部閭簪裾  
終羨寒臄只蠹魚  
每念故交今有幾  
況如盛德豈容疎  
京塵共歎催人老  
市道誰知有隱居  
久苦筆端枯渴甚  
楚波正欲借君餘

劉德修右史去國示所和從父東谿及楊子直詩  
走筆次韻

無人為辨樂羊書  
卻向空山問草廬  
世上榮枯無定在

眼前毀譽竟何如寸心未徹九重上百口仍行萬里餘  
只恐君王思舊學便看飛詔促嚴徐

東谿詩似老彌明傾蓋論詩絕點塵筆墨為供無盡藏  
江湖乞得自由身出門遠送成惆悵無計相留更主臣  
但願皇天開老眼不應空谷滯斯人

閣下相期久山中把酒稀未能容我去又復送君歸柱  
史寧終隱威顏暫咫尺達壯心誰與語看劍一燈微

謝袁起巖侍郎送盆桤奉老母



翠綃飛蓋擁生香  
冰雪精神試晚妝  
鶴髮慈親俄一笑  
玉人何事晚升堂

送曾南仲寺丞守永嘉

六和久坐趣歸鞭  
卻送旌麾水竹邊  
無說可俾新令尹  
有時重送老同年  
城隅綠竹今安否  
庭下朱欒定儼然  
回首東州真夢境  
羨君此去若登仙

過上虞懷謝驛喜雨

夢回簷溜作驚湍  
淨洗炎敲百慮寬  
咫尺東山見膏澤

令人更憶謝家安

答杖錫平老

老我平生不願餘  
歸來但欲賦閒居  
灌園自足供朝膳  
日奉夫人御版輿

送漳尉海陵併寄示瀟

二子俱從宦重親  
足自怡汝能行幼學  
吾豈恨輕離平  
日自知己真心更與誰  
臨文有遺忘此是憶兒時

處已幸寡過居官勿願餘  
動成經歲別騰寄幾行書  
公

退仍多學心清任索居但知行所職通塞聽何如

次潘安叔寄新溪詩韻

曾游明月舊雙谿老去情懷百不宜夢繞新谿身不到  
更休重和寄來詩

送內弟汪強仲赴台州稅官

雕鞍去去不容攀柳下門牆輟往還可但征商私龍斷  
不妨拄頰看巾山右軍墨妙惟修禊太傅才高亦抱關  
咫尺親庭母苦戀有人能作適齋閒

少潛兄再立畫錦坊伯中弟有詩次韻

東樓舊日史君家盛德于今說孟嘉  
畫錦門牆再興起烏衣巷口倍輝華  
雖無崔氏聯三戟肯學楊家簇五花  
尤喜桂枝香不斷藏書滿屋是生涯

王原慶訴盤餐蕭然走筆次韻

愁絕詩人太瘦生也無北食與南烹  
君看俚語亦堪笑何日能填鼻下橫

莫嗜鰕魚如老曹但應菜飯學參寥  
坡翁晚節更清苦

王粲新羹手自調

送趙振文主簿

去去江西不作難  
片帆雙槳蕩秋瀾  
已知宦業非時樣  
尤喜親情耐歲寒  
志大自然羞附驥  
官卑何用歎棲鸞  
少卿膝上加文度  
更比年時刮眼看

病足戲效樂天體

課得退連茹  
藥逢新太醫  
居閒幸餘暇  
養病任多時  
步屨雖非便  
調琴足自怡  
晚來風雨急  
高卧到晨炊

叔韶弟上連桂堂榜會羣從

我家簪紱百餘年書種于今幸有傳折桂時能取黃牒  
肯堂賴子抱青氈一新扁榜照華屋共集樽罍招衆賢  
須信後生尤可畏要當爭著祖生鞭

題林氏香巖庵

緩步尋佳處林深路欲迷偃松披數畝立竹漱三溪淪  
茗憑山檻呼燈照石梯輕輿空翠濕投暝喜幽棲

送汪強仲還官所

又向丹丘去安書易往還因官事了莫放舊書閒問  
訊雪巢老寄懷巾子山經行皆夢境自笑日蒼顏

寄題吳紹古縣尉經德堂

問舍玉真下讀書經德中心期知共遠臭味許誰同吹  
笛夜涼月舞雩春暮風直須涵泳熟毋負象山翁

送季舅汪江州

大定

二首

清直如公天自知晚年百順了無虧九城臺下方還旆  
五老峯前又擁麾題坐喜逢陳仲舉據牀好繼庾元規

太平散吏無由到倚聽中和樂職詩

舅甥相與自垂髫游宦歸來鬢已凋坐上可無車武子  
酒酣時賴蓋寬饒喜公自此驅千騎顧我從今守一瓢  
閒與適齋同悵望草堂樽酒幸清朝

送內弟汪耐翁隨侍因赴臨川推官

之子長才盍要津未知此別幾經春且爲湓浦過庭子  
徑作臨川入幕賓生長外家身已老周旋中表意尤親  
從今家問須情實莫事虛文學外人



環村踏雪

一冬求雪雨還晴  
賸喜春朝見玉霙  
不為偶同佳客到  
誰能深入亂山行  
雲牕霧閣知何限  
玉樹瓊枝到處明  
更喚輕舟同穩泛  
小谿何似剡谿清

荀輿衝雪過谿橋  
流水方東未晚潮  
白裏不知梅奪色  
青邊尤喜麥成苗  
烟深帶雨參差下  
空濶隨風自在飄  
可是忍寒請更切  
故求野路踏瓊瑶

又次蔣甥仲愚韻

山色空濛雪更奇，滿空擊碎碧瑤璃。  
寒侵茅屋春無寐，凍合梅花夜不知。  
泛泛輕舟勝路滑，洋洋流水樂人飢。  
興來但覺酒腸濶，江海安能實滿卮。

送元積弟赴永嘉酒官

宦遊五載住中川，似與邦人有夙緣。  
昔日江山知好在，舊游人物想依然。  
吾衰無復逢梅福，子去惟應夢阿連。  
或問故侯霜鬢未，吾言潘令是齊年。

我家清白世相傳，工部真清更有年。  
百口未曾營活計，

一生惟喜種心田  
吾方奉母耕綿上  
子更移封向酒泉  
兄弟凋零期自勉  
只將家訓作青氈

同王原慶知道游天童

舊游曾記夢中身  
一日重來白髮新  
行盡杉松三十里  
看來樓閣幾由旬  
狎鷗亭外波瀾濶  
宿鷺池邊草木春  
自笑賦歸如許久  
始來此地作閒人

東谷

舊說東阿谷  
茲來到此山  
樹深烟冉冉  
花落雨潺潺  
有

客禮師塔何人叩祖關天連秋水遠此意尚人間

千佛閣

平橫雲棟塞空虛倒影仍臨碧玉壺千佛威光歸寶所  
九霄宸藻粲河圖人天共歎未曾有燕雀相驚不敢踰  
試問南詢童子看化城曾見此樓無

從子滌濯寒納涼

楊柳陰陰映粉牆密雲藏雨晚來涼高荷欲出欄干上  
笑挹紅英吸淨香

漳謁告歸省復還海陵

吾子遠歸省重闈俱粲然難留毛義檄又送子真仙西  
去仍千里東歸約二年詞場期自力收取舊青氈

題少潛兄得閒

亭下水吞空輕舟處處通閒情誰得似逸興更何窮詩  
社率相過醉鄉時一中我家原不遠只在小橋東  
平日君多暇如今我亦閒人歸真得地吏隱勝居山烟  
浪一千頃茅簷三四間天寒倚修竹空翠濕敲鬟

送從子淵宰浦江

誰云宦路足嶮嶮送子之官獨放心廉介有餘無矯亢  
謙恭已甚自崇深安輿何用資三釜慶問時能抵萬金  
公退讀書三子侍縣齋松竹已成林

慈溪道中

雙檣真成鵝鶴鳴客愁厭苦夢魂驚須臾寢覺耳根熱  
一覺醒來天已明

題惠崇著色四時景物

舊說惠崇眞畫師生綃四幅見天機鷺翻桃岸韶光嫵  
鵝浴蓮塘暑氣微風勁賓鴻霜始肅寒欺花鴉雪初飛  
分明知是丹青卷仍欲沙頭喚渡歸

送吳參議

襄

才氣勇無前人推季子賢侯藩聯剖竹制幕晚依蓮勢  
利從身外風流到酒邊四明欣會遇兩載得周旋為記  
題名石仍吟達觀篇留行何及矣執別但茫然我已甘  
投老君方欲引年未知重見日目斷五湖船

即事

十日陰寒雪不成  
臘殘春近更霜晴  
深山高卧如春暖  
遶鬢飛蚊自在鳴

弔陳衛道墓

平生學博更加詳  
和會三家儘較量  
一覺可憐成夢蝶  
多岐終是易亡羊  
門前修竹連岩桂  
道上芙蓉間海棠  
何似剗除閒草木  
青松一色蔭高岡

游大梅山梅仙岩



為憶西京梅子真人言羽化匪沈淪海瀕古墓已無迹  
山外高風寧有神鯁論至今光漢傳清風猶足盪秋旻  
何須更說神仙事終老市門良可人

虎冢

辛勤玉柙更珠縐或見人牙出骨須驚獸一心能護法  
敝帷千載尚全軀餘威凜凜空埋骨遺像耿耿若負嵎  
及見當年梅子熟自應驚倒老妖狐

謝潘端叔惠紅梅

有序

潘端叔惠紅梅一本全體皆江梅也香亦如之  
但色紅爾來自湖湘非他種比自此當稱為紅  
江梅以別之王文公蘇文忠石曼卿諸公有紅  
梅詩意其皆未見此種也感歎不足為賦二十

絕

舊家桃李種河陽今日紅梅自楚湘  
根撥送春君意重為移絕艷到吾鄉

黃姑曾為點冰肌亦有緇塵染素衣  
何似臙脂天賜與

暗香猶在是耶非

為君手種向南牕誤認昌州移海棠元是玉妃生酒暈  
帳中仍帶返魂香

前身施粉忌太白今日施朱恐太紅說似旁人剛不信  
清香萬斛在花中

殿後鞦紅色漫穠絳桃空自笑春風何人擊碎珊瑚樹  
惱得瑤姬面發紅

舊見寒花蠟帶紅寧知沁入雪膚中絕憐金谷佳人墜

到地餘香散曉風

梅花幾種盡相聞  
老矣才欣見此君  
相與對花文字飲  
絕勝歌舞醉紅裙

人間丹桂亦微黃  
未見紅葩解有香  
惟喜此花兼衆美  
麝臍薰徹絳紗囊

初移湘水一枝春  
臘馥還欣為我分  
夢入山房三十樹  
何時醉倒看紅雲

歲晚紅英繞凍柯  
玉人無那醉顏酡  
廣平賦就如逢汝

鐵石心腸可奈何

少陵年後詠花開未見臙脂一抹腮可惜當時詩興動  
止因東閣看官梅

坡翁著意賦三詩漫說濃香已透肌若見此花應絕倒  
惜君生晚不逢時

花品無庸定等差國香國色屬吾家海棠正自慚粗俗  
莫問漫山桃李花

不學江頭玉樹寒壽陽紅粉舊妝殘嬋娟可是慚隨俗

莫作金沙鎖骨看

客來試與倚闌干  
拂拂清香觸鼻端  
儘教北人渾不識  
不應改作杏花看

全體江梅臘裏芳  
紫綿新拂漢宮妝  
臨川借得江梅句  
傾國天教抵死香

詩老為花空自忙  
想應未識此奇芳  
青枝綠葉何須辨  
桃杏安能如許香

只說梅花似雪飛  
朱顏誰信暗香隨  
不須添上徐熙畫

付與西湖別賦詩

縞裙練悅玉為肌誰點微頰向北枝若是羅虬見顏色  
定須將此比紅兒

自昔梅花雪作團紅梅晚出可人看江梅不解追時好  
祇守冰姿度歲寒

山行

行入春山紫翠中入山深處更桃紅一百五日麥秋冷  
二十四番花信風千頃搖青幾蔽地四山聳翠欲浮空

野橋橫跨溪如練待買輕舟下釣筒

金蹄

金蹄垂耳小韓盧飾以重環馴可呼誰繫冬青碧陰下  
恍然如見擊桐圖

次吳伯華韻

一身遇坎復乘流景物當前亦自由淺草人行回作徑  
水來沙聚看成洲哦詩首為鉤棘句適意即是逍遙遊  
爛醉不知門外事夕陽日日下西頭



從子澗送梅枝戲作

向來地暖見東嘉帶葉江梅殿  
歲華不似青春三月暮  
南枝梅子北枝花

菁江逐客

菁江十里路逶遲  
兩岸平疇接翠微  
贏得閒中乘畫舫  
隨潮西上趁潮歸

午睡聽雨

老年樂事莫如閒  
午睡醒來夢已闌  
枕上欠伸猶懶起

更聽簷外雨珊珊

放鶴送潘恭叔司理

沖霄六翮困蓬蒿清唳時時發九臯鵠立固應能獨出  
雞羣未免嘆徒勞相投顧我憐冰玉欲去知君刷羽毛  
幸脫樊籠隨所適平平飛去不須高

宿育王山涵秋

清秋來此尚涵秋雨後山泉自在流夜暗聲寒鏘玉珮  
燈明清影粲珠旒枕流正自憐孫楚洗耳何須訪許由

我亦暫來專一壑倚欄耽玩不知休

長女消歸夫家寄以小詩

胡笳未了遽成歸婦職如何敢失期彈到佳聲重入塞  
伯喈未免念文姬

太湖響石

何處飛來一段雲太湖風急到江城雲中疑有羣仙過  
時聽丁東環珮聲

送朱季公倅嚴陵

朱家族裔甲龍舒循吏清名史特書正為嗇夫思所部  
至今廟食盛鄉閭舍人曾賦嚴公瀨季子方題仲舉輿  
但向棠陰增蔽芾桐鄉今卻在桐廬

以十月桃雜松竹寘餅中照以鏡屏用瀟韻

中有桃源天地寬杳然溪照武陵寒莫言洞府無由入  
試向桃花背後看

次周益公韻

有序

某比從朱南劔獲拜覩丞相益公送行末章齒

及舅甥姓氏既又得盡見詩刻文潞公同甲會  
之盛世所共聞公與王錢三府名丙午坊尤為  
奇事今歐葛二賢士以布衣交五載與齊年之  
集壽樂未央高風厚誼古未有也舅氏尚書既  
已屬和命某同賦課成五首以謝厚意

天將間氣孕山川名世還當五百年已是有官居鼎鼎  
不妨平地作神仙書林尚欲校三豕筆力猶能驅兩肩  
前日勲名身既退斯文留與後人傳

六一先生葛稚川兩孫俱并相君年詞場鏖戰今成夢  
潭府齊盟望若仙政路三公舊同甲洛陽四老信差肩  
坊名丙午真奇事寫入詩編盡並傳

頃嘗假守向中川公在黃扉已數年每念夔龍容接武  
自期雞犬亦登仙入朝終嘆一交臂問道幾思偏袒肩  
數仞宮牆天樣遠此心何日遂親傳

別駕歸來自贛川相迎方歎別經年為言相國珠璣語  
寄問洞庭山澤仙妙句聳觀親盟手滿城爭玩日駢肩

退憐母子方偕隱卻恐虛名似此傳

舅甥相與老鄞川沉值慈親九十年畫舫時追唐賀監  
筍輿聯訪漢梅仙官名自媿偶同轍才望如何敢並肩  
誤辱品題稱酷似此聲梁楚更堪傳

題施武子所藏老融二牛圖

佳哉淡墨掃人牛一笛橫風各自由平日深知馬用稼  
如今但欲老西疇

烏犍離立意逶遲鞭策俱忘取次歸騃犢跳風仍卻顧

老融于此露天機

謝少微兄惠牡丹

乍觀泉石分新種想為黟山憶舊葩  
病後不妨風韻在此花之外更無花

方翦欄干第四花玉人聯袂過吾家  
捻紅玉翼皆名品醉眼相看到月斜

簫鼓聲中醉九旬落紅萬點正愁人  
眼明忽見傾城色更向尊前作好春



戲和漳詩卷

琴奕心偏好丹鉛手自磨  
衰翁會同社吾子揖餘波  
歌動玉條脫酒傾金叵羅  
好為文字飲行樂未宜多

山色藍初染湖光鏡始磨  
竹梢輕墜雨花片亂隨波  
塵尾揮東晉龍舟弔汨羅  
莫愁春易老暢飲一春多

澄江如練淨新月似鎌磨  
老柳飄輕絮良苗颭細波  
歌聲追古郢詩價怯新羅  
到處還成醉芳醪旨且多

暮年甘散誕壯志久消磨  
自媿今摩詰誰憐老伏波  
清

新慚庾信敏慧謝甘羅惟有詩情在猶能益辨多

過從子澤家

楚楚初篁脫綠苞城居約畧似荒郊土膏更得春風力

直引薔薇上竹梢

題陸放翁詩卷

沙畫初驚渴驥奔新詩熟讀歎微言四明知我豈相屬  
一水思君誰與論茶竈筆牀懷甫里青鞋布襪想雲門  
何當一棹訪深雪夜語同傾老瓦盆

送內弟汪莊仲赴浙西倉幕

家食八經秋茲馬喜宦遊往依王仲寶  
況事薛居州寄信憑鴻羽題詩寄虎丘  
飛雲親舍近時望海東頭

贈龍游術士胡杲

方笑劉郎問大鈞從來禍福本無門  
世間生老病死苦時至即行何足論

夜坐

晚來徐步出柴扃萬變浮雲在窈冥  
濃似鐵山擎缺月

薄于春絮透疎星正欣夜久沈天籟尤喜空明鬱帝青  
雨氣未平龍欲動電光前後射中庭

再送潘恭叔

我似冥鴻弋猶慕君如放鶴去還歸我空今日真成去  
好伴閒雲自在飛

以六經左氏傳莊子遺伯中弟有詩來謝次韻

手披欲究百家編奴婢年來識鄭玄顧我幸多千卷蓄  
念君未有一經全詩書心醉不容醒父子筆耕期有年

此但古人糟粕爾更須從此悟真筌

書種傳來直到今讀書幾似孝標淫欲君終就九經庫  
與子平分一片心更向漆園窮妙旨何殊清廟奏遺音  
中郎書籍付王粲想得知余此意深

中秋無月

涼意秋將半深期月影清昨霄雲點綴今夜雨縱橫睡  
久何曾著更闌喜暫晴起來聊曠望終欠十分明

贈丁相士

相形何似且論心眼力工夫見淺深古怪清奇任君說  
靈臺一片若為尋

送叔韶弟赴官錢清

蕞爾錢清鎮茲行正為貧九夷猶可處十室豈無人官  
守無卑小城居緩卜鄰老夫平日事所至若終身

淨明方丈

雲深宿雨未收晴短艇還來叩曉扃山溜擁溪侵石磴  
天風吹霧暗空庭茵鋪野草滋新綠玉立脩篁洗舊青

老我時時假僧榻夢魂直向醉中醒

新闢門徑或謂太窄

門外頓空曠雙眸豁太虛誰歟列佳樹正爾對吾廬蚤  
歲曾修業衰年得定居買鄰賢伯仲衣錦舊門閭未辨  
三間屋先栽數席蔬歡娛戲萊服晨夕奉潘輿駟馬容  
雖狹齋郎任有餘牀金知己盡瓶粟豈無殊細草沿堦  
嫩新篁得雨初竊希仁者靜未覺故人疏畫永翻名畫  
更長理舊書何妨抱琴醉儘好帶經鋤耄穉同甘苦兒

孫共卷舒眼花多掩卷鬢雪不堪梳少飲無求醉徐行  
可當車此生千萬足祇願老樵漁

小溪道中

簇簇蒼山隱夕暉遙看野雁著行歸久之不動方知是  
一搭碎雲寒不飛

後衙環村儘遡游鳳山寺下換輕舟舟人努力雙篙急  
引得清溪逆岸流

送從子淵葬




晨起霜如雪天寒水欲冰  
引舟拖急瀨扶杖立危層  
北阮苦多事二疏俄喪明  
山阿埋白壁悲慟不能勝

早起戲作

枕穩衾溫夢乍回  
閒居不怕漏聲催  
天明更欲從容睡  
長被孫兒惱覺來

午睡戲作

早起三朝當一工  
老來貪睡不相同  
偶然一次五更起  
卻用重眠到日中



攻媿集卷九